

17 AUG 1996

Mahathir-Barangan

MAHATHIR: MALAYSIA PERLU KELUARKAN BARANGAN SIAP

BANGI, 17 Ogos (Bernama) -- Datuk Seri Dr Mahathir Mohamad hari ini berkata sudah sampai masanya bagi Malaysia mengusahakan sendiri pengeluaran barangan siap di dalam negara dengan menggunakan bahan-bahan mentah tempatan seperti minyak sawit.

Perdana Menteri berkata Malaysia wajar bergerak cergas dalam bidang pembuatan barangan hiliran dengan mewujudkan industri berasaskan komoditi dalam usaha menjadi sebuah negara perindustrian yang maju.

Dalam hubungan ini, beliau berkata industri minyak sawit menunjukkan potensi yang sangat besar.

"Melalui pembabitan industri sawit dalam aktiviti hiliran bermakna kita akan dapat mempertingkatkan hasil pendapatan negara daripada komoditi eksport tradisional ini," katanya semasa merasmian Pusat Kemajuan Teknologi Oleokimia (AOTC) di Institut Penyelidikan Minyak Kelapa Sawit Malaysia (Porim) di sini.

Menteri Perusahaan Utama Datuk Seri Dr Lim Keng Yaik turut hadir pada majlis itu.

Dr Mahathir berkata pada masa ini aktiviti hiliran hanya tertumpu kepada pengeluaran bahan oleokimia asas seperti asid lemak, methylester dan gliserin.

Kata beliau, kini terdapat 15 buah kilang oleokimia yang mengeluarkan sebanyak 740,000 tan metrik oleokimia asas.

Perdana Menteri berkata lebih kurang 90 peratus daripada jumlah oleokimia itu dieksport ke negara-negara maju seperti Amerika Syarikat, Eropah barat dan Jepun untuk pemprosesan hiliran.

Selepas menjalani pemprosesan hiliran, Malaysia pula mengimport semula dalam bentuk produk siap dengan harga yang berlipat ganda "lebih tinggi daripada oleokimia asas yang kita eksport".

"Apa yang sebenarnya berlaku ialah aktiviti pemprosesan hiliran ini dibuat di negara-negara pengimport yang berjaya menjana serta menikmati hasil nilai tokok produk berkenaan," katanya.

"Sudah sampai masanya kita sendiri mengusahakan pengeluaran barangan-barangan siap di dalam negara kita," kata beliau.

Dr Mahathir berkata bagi sebuah negara yang berada di ambang era perindustrian, industri sawit di Malaysia perlu menumpukan kepada pembangunan sektor pembuatan barangan hiliran yang lebih menguntungkan.

Ini akan membolehkan Malaysia mengekalkan kedudukannya di dalam memaksimumkan pendapatan negara daripada industri sawit, kata beliau.

Dr Mahathir mahu supaya penggunaan minyak sawit dipertingkatkan dalam sektor bukan makanan.

Beliau yakin bahawa Malaysia mempunyai keupayaan untuk mengubah corak industri sawit daripada satu industri pertanian atau tradisional yang berjaya kepada industri moden yang lebih canggih.

Kata beliau, peluang untuk membangunkan sebuah industri oleokimia yang maju adalah cerah kerana bahan mentah oleokimia didapati dengan banyaknya dan pasaran atau permintaan terhadap barangan daripada oleokimia juga adalah luas.

"Sesungguhnya kita telah mengenalpasti sektor oleokimia sebagai sektor yang kian menjadi pemangkin kepada pertumbuhan industri sawit negara pada masa akan datang," katanya.

Beliau berkata industri sawit akan diberikan lebih tumpuan di bawah Pelan Induk Perindustriaan (IMP) Kedua yang akan dilancarkan tidak lama lagi.

"IMP Kedua yang berasaskan konsep rangkaian boleh menggunakan sektor oleokimia sebagai satu rangkaian yang memang sesuai untuk menubuhkan satu pembangunan aktiviti ala Lembah Silikon yang terkenal itu," kata beliau.

Dr Mahathir berkata dengan tertubuhnya sektor industri oleokimia yang maju, status minyak sawit bukan lagi dikenali sebagai satu komoditi yang dibandingkan dengan minyak soya sebagai minyak makanan, sebaliknya ia dianggap sebagai bahan oleokimia sepertimana petroleum dijadikan sebagai sejenis barangan pengguna.

"Kini, Malaysia telah muncul sebagai pengeluar oleokimia asas yang ketiga terbesar di dunia dan merangkumi 20 peratus daripada jumlah bekalan oleokimia dunia," kata beliau.

Beliau juga berkata pelaburan dalam industri oleokimia kini mencapai RM1.5 bilion yang mana syarikat asing mempunyai majoriti 54 peratus.

Dr Mahathir berkata pengusaha-pengusaha industri kecil dan sederhana harus melibatkan diri dalam industri itu.

Perdana Menteri kemudian melawat pameran dan makmal AOTC yang merupakan pusat penyelidikan dan pembangunan oleokimia yang pertama di Malaysia yang membuat kajian terhadap oleokimia sawit.

-- BERNAMA

ES AKD